



Saradnja Cazina sa turskim općinama

Nastavlja se **AKADEMIJA ZA GRAĐANE**

Posjeta predstavnika BIGMEV CENTRA Cazinu



Cazinjani obilježili DAN NEZAVISNOSTI BIH



Uvodna riječ NAČELNIKA OPĆINE

Poštovani sugrađani, prijatelji, saradnici



Veliko mi je zadovoljstvo predstaviti Vam jedanaesti broj našeg informativnog biltena. I ovoga puta stranice CazinInfo obiluju informacijama o dešavanjima na području naše općine, projektima koje smo realizirali i koje ćemo raditi u narednom periodu, prijemima organiziranim za mnogobrojne goste, prijatelje naše općine, održanim predavanjima, raspravama i sl. Posebno je bitno da svoju obavezu informisanja javnosti shvaćamo ozbiljno i kontinuirano radimo na jačanju interne i eksterne komunikacije sa građanima i okruženjem. Smatramo da jedan kolektiv može biti jak onoliko koliko je jaka njegova najslabija karika i zbog toga tražimo modalitete rada i usavršavanja koji će biti po mjeri svakog uposlenika. Isto tako, smatramo da jedna lokalna zajednica ima dobar imidž onoliko koliko sve nje-

ne mane uspijemo pretvoriti u prednosti, bilo privredne, turističke, kulturne, ili društvene. To je naš cilj, naša zadaća i naš posao. Uz Vas i Vaše povjerenje budućnost može biti samo bolja.

Nadam se da će svako od Vas pronaći neku zanimljivu i korisnu informaciju unutar našeg biltena. U narednom periodu ćemo razmotriti mogućnost štampanja istog u većem tiražu i drugačijim formatima kako bismo zadovoljili potrebe šireg kruga korisnika. Želimo Vam ugodno čitanje i svako dobro.

OPĆINSKI NAČELNIK
mr. Nermin Ogršević

april 2012. / broj XI

I IZ KABINETA NAČELNIKA

Delegacija Općine Doboj Jug posjetila Cazin

Delegacija Općine Doboj Jug na čelu sa načelnikom Džavidom Aličićem boravila je u posjeti Cazinu 13. decembra prošle godine. Cilj posjete bilo je međusobno upoznavanje, ali i razmjena informacija posebno u pripremi i realizaciji projekata i aplikacija prema raznim međunarodnim fondovima. Načelnici su ukratko prezentirali svoje općine sa osnovnim karakteristikama, a njihovi saradnici su se pozabavili konkretnim pitanjima i projektima.

Načelnik općine Doboj Jug, Džavid Aličić ovom prilikom je rekao: „S obzirom da smo znali da je općina Cazin jako inventivna općina, prije svega napredna općina, koja je jako puno uložila u infrastrukturu i imala veliki napredak u administraciji, opredjelili smo se da dođemo baš ovdje, da vidimo ono što je nama interesantno, da dođemo do znanja i dobrih iskustava, koja bismo sutra primjenili na našu općinu. Općina Doboj Jug je mlada općina, koja postoji tek 13 godina, ali ima veliki deficit i veliku potrebu za završetkom infrastrukture i administrativnim uređenjem općine. Na samom ulazu u vašu općinu komentarisali smo da se radi o lijepoj općini, pitomom krajoliku i vjerujem da je ovo sredina jako lijepa za življenje, a kao što vidimo i broj stanovnika potvrđuje da je to jedna od naseljenijih općina u BiH. Dosta toga smo saznali od načelnika Ogrševića i njegovih saradnika, posebno za realizirane projekte i one koji će se raditi u budućnosti. Ta iskustva će nam koristiti da lakše implementiramo naše planove. Naše dvije općine posebno vezuje zajednički projekat, ORIO, u kojem je općina Cazin dobila sredstva, dok mi na žalost nismo prošli, ali očekujemo naredni poziv i u tom kontekstu želimo razmjeniti iskustva sa kolegama u Czinu.“

Zbog svojih razvojnih planova, uspješno realiziranih projekata, velikog broja partnera u međunarodnim organizacijama i domaćim institucijama općina Cazin je postala interesantan primjer drugim lokalnim zajednicama. „Nama je zadovoljstvo ugostiti prijatelje iz općine Doboj Jug i podijeliti sa njima svoja iskustva u jačanju administracije i privrednih potencijala. Vrlo rado ćemo svoje ljude staviti na raspolaganje drugima u cilju prenošenja informacija i pozitivnih iskustava u rješavanju problema naših građana i stvaranju povoljnog poslovnog ambijenta u Czinu“,

riječi su načelnika Ogrševića koje je uputio svojim gostima.



Sastanak u kabinetu načelnika

Zajednički zaključak je da dvosmjerna komunikacija može pomoći objema stranama da ojačaju svoje kapacitete i stvore prijateljske veze koje su osnova za realizaciju budućih projekata u ovim sredinama. Činjenica je da općine u BiH imaju iste ili slične probleme, budući da su oni prvi i najbliži servis građanima, zbog čega se većina pitanja treba riješiti upravo na ovom nivou. Zajedno se stvari puno lakše i brže završavaju, zaključili su gosti prilikom susreta sa načelnikom Ogrševićem i njegovim saradnicima.

Nakon sastanka gosti su u pratnji domaćina obišli i administrativni dio Općine, Centar za pružanje usluga, kao i užli dio grada.

U centru za pružanje usluga građanima



Načelnici Ogršević i Aličić



Cazin i Šile bratske općine



U posjeti općini Cazin boravila je delegacija općine Šile, jedne od istanbulskih općina koja se nalazi u azijskom dijelu ovog višemilionskog grada, na čelu sa načelnikom općine Canom Tabakoğluom. Posjeta je bila rezultat pregovora o bratimljenju naše općine sa ovim turističkim središtem u istanbulskoj metropoli.

Tom prilikom gostima iz Turske su prezentirane osnovne karakteristike naše općine, od kojih su im mnoge bile i dosta poznate. „*Imate jako lijepu zemlju, čiji su poseban ukras ljudi. Nalazimo se u općini koja je jako dinamična u svojim aktivnostima, što ukazuje na njenu svijetlu i pozitivnu budućnost. Naš cilj je da na kulturnom planu ostvarimo što bolju saradnju, a istovremeno želimo da razmjenimo pozitivna iskustva, jer imamo dosta dodirnih tačaka*“, riječi su načelnika Tabakoğlua nakon svega što je čuo o općini Cazin.

Općina Šile je istanbulska općina koja u zimskom periodu ima oko 30.000 stanovnika, a u ljetnom periodu taj broj naraste i do pola mi-

liona, zbog činjenice da se radi o turističkom centru na obali Crnog mora. Ova općina je poznata po mnogim prirodnim ljepotama i turističkim atrakcijama, sa brojnim kulturnim spomenicima. Na njenom području nalazi se i jedno bošnjačko selo, a zbog blizine mora jedna od najrazvijenijih privrednih grana je ribarstvo. Općinski načelnik Nermin Ogršević je naglasio da je posjeta prijatelja iz Turske prilika za međusobnu razmjenu informacija iz različitih oblasti, kako bi se mogli definisati i mogući oblici saradnje. „*Na osnovu informacija koje smo dobili evidentno je da je oblast za saradnju veoma široka. Prije svega postoji volja i želja sa obje strane, što je preduslov za dobru saradnju, a između naših dviju sredina postoji dosta dodirnih tačaka. Za našu općinu značajne su privredne inicijative s obzirom na potencijal kojeg ima ovo područje*“, rekao je načelnik Ogršević nakon susreta sa gostima.

U narednom periodu slijedi uzvratna posjeta delegacije Općine Cazin, budući da je OV donijelo Odluku o bratimljenju naše općine sa općinom Šile.



Načelnik općine Cazin primio predstavnike Udruženja poljoprivrednika „Krajina“

Načelnik općine Cazin Nermin Ogršević u prisustvu svojih saradnika održao je radni sastanak sa predstavnicima Udruženja poljoprivrednika „Krajina“ Cazin. Tema sastanka bili su:

- problemi u agraru sa akcentom na problematiku u proizvodnji i lancu otkupa mlijeka,
- isplata poticaja iz 2011. godine i
- plan budžeta – grant za razvoj poljoprivrede za 2012. godinu.

Razmatrana su i ostala mnogobrojna pitanja koja muče poljoprivredne proizvođače, kao što je nezadovoljstvo sa visinom otkupne cijene mlijeka, nepostojanje zaštitne cijene mlijeka, visina cijene za izradu mliječnog kartona i sl.



Načelnik Ogršević je na ovom sastanku istaknuo da je interes društva u cjelini da ima poljoprivredne proizvođače, bez obzira na kapacitet proizvodnje. Taj interes društva tim je veći u sadašnjem društvenom trenutku, misleći na vrijeme ekonomske krize. On smatra da je neprimjeren uspostavljeni kriterij za federalne podrške, prema kojem nije predviđena podrška malim kooperantima sa jednim ili dva dunuma površine, iako ti proizvođači imaju čak i kvalitetnije proizvode od onih sa većom površinom zemlje. Ovdje je također važno naglasiti da Općina proizvodnju mlijeka potiče kroz tri segmenta:

- subvencioniranje troškova proizvedenih količina kravljeg mlijeka u kooperaciji,
- participacija izrade mliječnog kartona i
- sufinansiranje troškova cijepjenja goveda protiv antraksa.

Prema riječima Načelnika općine Cazin isplata općinskih poticaja realizirat će se na sličan način kao i prošle godine, a po redosljedu podnesenih zahtjeva. Na prvom mjestu ići će isplata za mlijeko, koja treba biti realizirana do 15. marta ove godine. Načelnik je također nagovijestio da će u 2012. godini grant za poljoprivredu biti u nivou prošlogodišnjeg tj. 300.000,00 KM, uvećano za iznos ne realiziranih zahtjeva od 65.200,00 KM, što je rezultat povećanog broja zahtjeva i povećanog obima proizvodnje u 2011. godini.

Gosti iz Udruženja kažu da im je jasno u kakvoj se krizi nalazi naša zemlja pa i općina. Dodaju da ne očekuju rješenje problema

preko noći, ali zato očekuju intenzivniju saradnju. Predsjednik ovog Udruženja, Ale Čoralić, navodi da su sada u mnogo boljoj situaciji, jer je riješen status Udruženja, izabrano novo rukovodstvo, obezbijedena kancelarija za rad i sl. „*Zadovoljni smo odnosom Općine prema nama i našim članovima. Jasno nam je da ovakve podrške i poticaja nema u mnogim drugim sredinama, zbog čega ćemo biti strpljivi za rješavanje problema koji nam stoje na putu. Bitno je da postoji obostran interes, što smo danas potvrdili na ovom sastanku sa načelnikom i njegovim saradnicima*“, rekao je gospodin Čoralić.

Prvi čovjek naše općine smatra da je sasvim neupitna podrška poljoprivredi i njenim proizvođačima. „*U našoj sredini se radi o velikom broju ljudi koji na taj način obezbjeđuju egzistenciju sebi i članovima svoje porodice. Dakle, ova grana privrede je nama od strateškog značaja i zbog toga ulažemo značajna sredstva u nju. Činjenica je da podržavamo i određene dodatne programe, koji se pojavljuju u toku godine, a sve u namjeri da se na ovim prostorima stvara dodana vrijednost, otvaraju nova radna mjesta i živi život dostojan čovjeka. Isto tako, važno nam je da i poticaji ostalih nivoa vlasti budu transparentniji i da se ne limitiraju po nekim nevažnim kriterijima. Pravedno je da poticaje dobiju svi, naravno, u zavisnosti od obima proizvodnje*“, rekao je načelnik Ogršević u razgovoru sa gostima.

Posjeta predstavnika BIGMEV CENTRA Cazinu

U prvoj polovini mjeseca januara tekuće godine načelnik naše općine primio je u svom kabinetu delegaciju koju su sačinjavali Murat Silsupur, turski poduzetnik i vlasnik firme ESAT Ltd. Turska, zatim Almir Mukača predstavnik BIGMEV Centra za razvoj ekonomskih odnosa između Turske i Bosne i Hercegovine, te direktor Poljoprivrednog zavoda USK Smail Toromanović. BIGMEV Centar ima sjedište u Istanbulu i Sarajevu, a cilj mu je unapređenje odnosa između Turske i BiH, te investiranje u prerađivačke pogone.

Murat Silsupur je izrazio zadovoljstvo posjetom Cazinu i istaknuo: **„Ovim putem se zahvaljujem općinskom načelniku što nas je primio i omogućio nam sve informacije, a nadam se da će nam pomoći i u ostvarivanju naših zamisli koje se odnose na ulaganje u lokalnu privredu. Naš cilj je razvoj poljoprivrede i izrada gotovog, finalnog proizvoda, spremnog za tržište.“**

Prema riječima gospodina Mukače, BIGMEV Centar je osnovan kako bi pomogao u privlačenju investicija na ove prostore i omogućio bosanskohercegovačkim kompanijama da plasiraju svoje proizvode na tursko tržište. **„Došli smo na poziv gospodina Toromanovića, direktora Poljoprivrednog zavoda USK. Prethodno smo u razgovoru s njim tražili određene količine obradivog zemljišta za potencijalne investicije iz Turske. Područje Cazina smo odabrali jer se radi o površinama koje su nezagađene, imaju dosta potencijala i zato što na ovim prosto-**

rima postoji tradicija bavljenja poljoprivredom od strane lokalnog stanovništva“, rekao je predstavnik BIGMEV Centra u BiH. On je još naglasio da je najvažnija stvar u ovoj priči zapravo blizina EU, što bi omogućilo izvoz proizvoda direktno na evropsko tržište.



Općina Cazin i njeni predstavnici iskazali su spremnost da pomognu potencijalno otvaranje novih radnih mjesta, zbog čega su gostima pružili sve potrebne informacije. **„Činjenica je da nama trebaju nove investicije, nova tržišta i nova radna mjesta. Zbog toga smo spremni uložiti sve napore da se ova ideja realizira što prije, posebno zbog onih koji će kroz ovu priliku obezbijediti egzistenciju svojim porodicama. Otvoreni smo za saradnju, spremni pomoći i olakšati sve potrebne pripreme za pokretanje ove investicije. Želimo da ljudi ostanu u Cazinu, da ovdje pronađu uspjeh i grade svoju budućnost“**, rekao je načelnik Ogršević u toku razgovora sa gostima.



Susret u kabinetu načelnika



Načelnik općine Cazin primio predstavnike udruženja **„Proizvođača jagodastog voća i povrća“**

U kabinetu načelnika općine Cazin Nermina Ogrševića održan je radni sastanak sa predstavnicima „Udruženja proizvođača jagodastog voća i povrća“ Cazin. Teme sastanka su se odnosile se na predstavljanje Udruženja, prezentaciju o radu i aktivnostima u 2011. godini, te planove Udruženja za tekuću godinu. Razmatrana su i ostala pitanja i problemi koji se tiču ovog Udruženja, njihovih članova i drugih komercijalnih proizvođača voća i povrća.

Predstavnici Udruženja istaknuli su da namjeravaju angažiranije djelovati u smjeru jačanja Udruženja, a edukativnim procesima poboljšavati ovaj vid proizvodnje u kvalitativnom i kvantitativnom smislu, u čemu vide veoma značajnu ulogu i podršku lokalne zajednice. Iskoristili su priliku i upoznali načelnika sa projektom „Pravilne upotrebe pesticida radi zaštite pčela kao oprašivača“, a koji je u realizaciji od novembra prošle godine. Isti projekat je simbolično podržan od strane resornog Federalnog ministarstva.

Načelnik Ogršević je istaknuo da je interes društva u cjelini da ima poljoprivredne proizvođače, bez obzira na kapacitet proizvodnje. Taj interes društva tim je veći u sadašnjem društvenom trenutku, u situaciji sveopće krize. Nepojmljivo je, smatra načelnik, da je uspostavljen kriterij za federalne podrške prema kojem nije predviđena podrška malim kooperantima sa jednim ili dva dunuma površine, iako ti proizvođači imaju proizvode čak i kvalitetnije od onih sa pet dunuma i sl.

Kad je u pitanju podrška proizvodnje jagodastog voća i povrća Općina istu potiče kroz nekoliko vidova:

1. subvencioniranje repromaterijala (sistem za navodnjavanje, mreža, folija, sjeme povrća, sadnice malina i jagoda, zaštitna sredstva) kooperantske proizvodnje povrća i jagodičastog voća i
2. subvencija troškova održavanja nasada jagodičastog voća u fazi rodnosti.

Načelnik je nagovijestio da će u 2012. godini grant za poljoprivredu biti u nivou prošlogodišnjeg. Podržao je namjeru Udruženja da se aktivno sa svojim prijedlozima uključi u kreiranje Pravilnika o načinu raspodjele Granta za razvoj poljoprivrede - budžetske stavke Općine, ali da se još angažiranije uključe i daju svoj doprinos u izradi kriterija za poticaje viših nivoa, misleći na kanton i federaciju, jer su tu u pitanju i daleko veća izdvajanja za ovu namjenu.

Prema njegovim riječima Općina Cazin spada u sami vrh lokalnih zajednica koje izdvajaju značajna sredstva za poljoprivredu i njezne proizvođače. **„Djelimo direktne poticaje svakom poljoprivrednom proizvođaču, zbog činjenice da se kroz ovaj vid proizvodnje obezbjeđuje priliv novca i egzistencije za ljude, čime dobijemo i nekoliko hiljada zaposlenih. Naše je opredjeljenje da podržimo ovu oblast i izražavamo protest prema kantonalnom i federalnom pristupu u dodjeli subvencija koje se ograničavaju provršinom uzgoja određene kulture, zbog čega su mali proizvođači ostali isključeni iz ovakvih vidova pomoći. Konstatirali smo da se naše neslaganje mora javno izraziti i da ove godine ne smijemo dozvoliti da ovakva proizvodnja bude isključena iz programa poticaja“**, rekao je načelnik u razgovoru sa svojim gostima.

Predstavnici Udruženja smatraju da u Pavilnik o poticajima trebaju biti uključeni i proizvođači koji do sada nisu obuhvaćeni ni u općinama, ni kantonima, a posebno ne federalnim poticajima. Tu je riječ o proizvođačima lubenice, kupusa i ljekovitog bilja. **„Također se zahvaljujemo općini koja nam pruža bezrezervnu podršku i podržava sve proizvođače, dok kanton pravi ograničenja na 2 dunuma, a federacija na 5“**, pojasnio je Rusmir Salkić, predsjednik ovog udruženja.

Generalna konzulica R Hrvatske u Cazinu

Općinski načelnik Nermin Ogršević i predsjedavajući OV-a Haris Ćoralić ugostili su 25. januara Generalnu konzulicu Republike Hrvatske u Banja Luci Dunju Jevak. Kako je istaknula Generalna konzulica, ovo je njena prva posjeta Cazinu, a namjera joj je upoznati se sa stanjem u ovoj općini i sagledati mogućnosti za razvijanje saradnje u različitim oblastima.

Načelnik Ogršević i konzulica Jevak



Domaćini su na početku razgovora čestitali konzulici referendumsku potvrdu ulaska R Hrvatske u EU. Nakon toga je načelnik Ogršević upozao goste sa karakteristikama naše općine i njenim specifičnostima. Posebnu pažnju obratio je na tradicionalno dobru saradnju sa susjednim općinama u Hrvatskoj. „Iznimno mi je drago što smo imali priliku ugostiti konzulicu Jevak u našoj općini. Važno je da stvaramo prijateljstva i gradimo mostove saradnje. Nama je Hrvatska strateški partner u mnogim projektima prekogranične saradnje, ali i u bilateralnim odnosima. Zbog toga se radujemo njenom ulasku u EU, jer će time naša zemlja graničiti sa ovom zajednicom naroda, zemalja, kultura i privreda. Nadam se da će to našoj općini donijeti dobrobit i da ćemo razvijati naše kapacitete u svim segmentima“, rekao je načelnik Ogršević.

Na kraju susreta, konzulica Jevak je uputila poziv hrvatskim državljanima sa ovih područja na konzularne dane u Bihaću, koji će se organizirati od mjeseca februara prema prethodno najavljenom kalendaru.

Konzulica R Hrvatske u Cazinu



Susret sa penzionerima

Penzioneri posjetili načelnika

Na samom početku nove godine u kabini načelnika upriličen je prijem za predstavnike Udruženja penzionera općine Cazin. Ovo je bila prilika da se napravi osvrt na aktivnosti u proteklom periodu i da se razmotre mogućnosti za podršku određenim projektima i aktivnostima u toku tekuće godine.

Kako je istaknuo Bajro Mahmutović, predsjednik Skupštine ovog Udruženja, tragovi opće krize su vidljivi u svim segmentima našeg društva, a najviše je osjeća kategorija penzionera. Naravno, u fokusu razgovora je bila socijalna problematika. Predstavnici penzionera upoznali su načelnika sa aktivnostima koje su poduzete za blizu 2.300 članova njihovog udruženja. Prema njihovim navodima, samo u protekloj godini imali su 93 smrtna slučaja, za koje je obezbijeđena jednokratna pomoć Udruženja.

„Svake godine dolazimo na prijem kod načelnika, jer je po našem planu i programu predviđeno da se načelnik informiše o situaciji i stanju u općinskom udruženju penzionera, kako sa članstvom tako sa socijalnim problemima, bolesnima itd. Nama je najbitnije da nas neko razumije, da ima želju i namjeru da nam po-

mogne, a ako se nešto dodatno može učiniti svakako je dobro došlo. U ovoj godini se nadamo većoj i značajnijoj podršci šireg kruga društva, kako bismo realizirali neke naše planirane projekte“, riječi su predsjednika Mahmutovića.

Općinski načelnik je podsjetio da već dugi niz godina postoji dobra saradnja između lokalne zajednice i Udruženja penzionera.

„Ovo je bila dobra prilika da se podsjetimo na započete projekte koje treba završiti i da razgovaramo o novim idejama, sve u funkciji da kroz određene općinske subvencije, finansijske dotacije, pomognemo, kako radu udruženja, tako i najugroženijim članovima ove populacije“, rekao je načelnik Ogršević. On je također čestitao predstavnicima udruženja na predanom radu i kvalitetnim projektima, jer su, prema njegovom mišljenju, penzioneri svojim primjerom pokazali kako pomoći drugima u nevolji, što svakako trebaju slijediti i ostali članovi naše zajednice.



uspješno aplicira projektne ideje



Delegacija Općine Gradačac odlučila je početkom ove godine posjetiti našu općinu, kako bi u direktnim razgovorima sa načelnikom i njegovim saradnicima razmjenili iskustva u vezi sa projektima aplikacijama koje je Općina Cazin do sada uspješno realizirala. Općinu Gradačac i njihove predstavnike najviše je zanimao Orio program, putem kojeg je našoj Općini odobreno 8 miliona KM nepovratnih sredstava.

Prema onome što je rekao načelnik Ogršević, za uspješno planiranje, projektiranje, apliciranje, ali i svaki dugoročni projekat najvažniji su ljudi, sposobni, kvalificirani i nadasve vrijedni, što je Općina Cazin uspjela okupiti u posljednjih nekoliko godina.

„Danas imamo kompetentne ljude koji su sposobni odgovoriti izazovima ubrzanih razvojnih promjena i zbog kojih je porastao rejting naše općine u domaćim i međunarodnim krugovima“, smatra načelnik Ogršević.

Da je istina ono što navode mnogi gosti i partneri Općine Cazin potvrđuje i načelnik Gradačca. *„Općina Cazin nam je poslužila kao pozitivan primjer u vremenu koje zahtijeva kvalitetne projektne aplikacije, naročito kod velikih projekata i ozbiljnih donatora. Čestitamo Općini Cazin na svemu što su do sada postigli. Vaša iskustva u apliciranju projekta kanalizacione mreže biće nam od velike koristi u našim budućim i aktuelnim projektima i programima“,* rekao je, između ostalog, načelnik Imširović.

Susret predstavnika dvije općine



Ispratili starog šefa

Misije OSCE ureda u Bihaću

Općinski načelnik i njegovi saradnici primili su u petak, 09.marta, predstavnike Ureda Misije OSCE-a u Bihaću, a povodom primopredaje dužnosti dosadašnjeg Šefa ureda Farukha Islomova i dolaska njegovog zamjenika Nikolaosa Kavallaris-Ladisa. Izražena je dobrodošlica novom Šefu ureda i napravljen osvrt na dosadašnju saradnju, ocijenjenu kao iznimno uspješnu.

Govoreći o danima provedenim u BiH, gospodin Islomov je naglasio da ga za ovaj kraj više ne vežu samo poslovni uspjesi i iznimno dobra saradnja sa lokalnim vlastima, već i mnoge prijateljske veze. *„Inače sam sedam godina u BiH, a zadnjih pet i po u Bihaću. Moram reći da sam vrlo zadovoljan saradnjom sa svim općinama USK-a, a posebno sa Cazinom, jer smo imali nekoliko vrlo konkretnih projekata, zajednički ih implementirali i ostvarili odlične rezultate. Politička volja i potencijal koji općina ima su bili ključni faktor za uspješnu realizaciju naših projekata i lično sam primjetio veliki progres u proteklom periodu, ali ima još puno stvari na kojima treba raditi i u okviru mandata OSCE-a. Mislím da će i moj zamjenik nastaviti raditi na unapređenju uslova u ovoj sredini“,* rekao je gospodin Farukh Islomov.

Domaćini su pokazali veliko zadovoljstvo rezultatima saradnje Općine i OSCE ureda u Bihaću.



Potpisan aneks ugovora

Prvi čovjek naše općine se nada da će takva situacija biti i u mandatu novog Šefa ureda, što je već izvjesno kroz nastavak realizacije projekata „Akademije za građane“. *„Drago mi je da su nakon višegodišnje saradnje pozitivne impresije, da su se članovi naših timova pokazali kao dobri saradnici i odgovorni partneri u projektima koji su nam zajednički sa Misijom OSCE-a. Time smo radili na izgradnji boljih uslova života za građane u našoj zajednici, ali istovremeno i na jačanju kredibiliteta naših ustanova i naših ljudi“,* rekao je načelnik Ogršević.



Nermin Ogršević i Farukh Islomov

Na kraju ovog susreta načelnik je gospodinu Islomovu poklonio sliku sa motivima Cazina kao znak sjećanja na zajedničku saradnju i njegov boravak na ovim prostorima.

Općina Develi želi bratimljenje sa općinom Cazin

U decembru 2011. godine općinu Cazin je posjetila delegacija turske općine Develi, koja je dio provincije Kayseri u centralnoj Turskoj. Prvi susret delegacija dvije općine bio je prilika da jedni druge upoznaju sa ličnom kartom svoje općine, nakon čega su uvidjeli mnogobrojne sličnosti između ove dvije sredine.



Na čelu višočlane delegacije bio je gospodin Ismail Develioğlu, zamjenik gradonačelnika ove općine, koja se odlučila bratimiti sa općinom Cazin. Gospodin Develioğlu je naglasio da je cilj povezivanje na kulturnom i privrednom planu rekavši: „Posjeta ima za cilj opće upoznavanje Cazina, kako bismo što bolje prenijeli osnovne karakteristike ovog lijepog područja, te pozvali naše ljude u turističke posjete, ali i privredne kontakte sa ljudima ovog kraja.“

Bitno je napomenuti da općina Develi ima preko 70.000 stanovnika i površinu od 1.870 km², a kontinentalna klima pogoduje razvoju poljoprivrede, koja je jedna od najrazvijenijih privrednih grana. Prema riječima gostiju Develi ima oko 16.000 učenika, jednu visoko obrazovnu instituciju i nezaposlenost je veoma niska. U svakom slučaju naglasili su da vide dosta

moćnih kompatibilnosti sa Cazinom, a u rukovodstvu općine Cazin vide dinamičan i aktivan tim, čiju posjetu očekuju uskoro u Develiju.



Sa druge strane, općinski načelnik Nermin Ogršević je iskoristio priliku da se zahvali književniku Osmanu Baymaku, koji je posredovao u povezivanju ove dvije općine. Načelnik je naglasio da treba uzeti u obzir da je Kayseri među industrijski najrazvijenijim područjima Turske, zbog čega nam je povezivanje sa ovim područjem jako bitno, ukoliko želimo stvarati osnove za privrednu razmjenu.

„Mi se trudimo da budemo dobri domaćini“, između ostalog rekao je općinski načelnik. „Trebamo se upoznavati, graditi međusobno povjerenje i na temelju svega toga razvijati dalje odnose“, dodao je načelnik Ogršević.

U toku boravka gosti su u pratnji domaćina posjetili Centar za pružanje usluga građanima, centralno šehidsko obilježje, kao i nekoliko starih gradova na području naše općine.

II RADIMO I DALJE...

Nastavlja se Akademija za građane

Projekat koji ima za cilj uspostaviti kvalitetniju saradnju između organa uprave i građana, baziranu na razumijevanju procedura, prava i obaveza koje postoje sa obje strane, ima svoj kontinuirani tok u Jedinstvenom općinskom organu uprave Općine Cazin. Naime, Općina Cazin je projekat Akademije za građane uvrstila u svoju Strategiju komuniciranja i time preuzela obavezu da aktivnosti ove ideje provodi svake godine, prema potrebama iskazanim od strane građana, predstavnika MZ, nevladinih organizacija i drugih.

Akademija za građane koju zajedno provode Općina Cazin i Misija OSCE u BiH ne promovira političke stranke, niti političke stavove. Otvorena je za sve građane, bez obzira na vjersku, rasnu, nacionalnu, dobnu, socijalnu, imovinsku ili bilo koju pripadnost. Sa stoji se od serije predavanja o načinu rada i funkcionisanja organa uprave, javnih ustanova i preduzeća, o procedurama koje se moraju ispoštovati za realizaciju nekog prava ili dužnosti, o projektima koje provodi lokalna zajednica u javnom interesu, o oblicima komunikacije građana sa uposlenicima Općine, o oblicima učešća u procesima odlučivanja koji stoje na raspolaganju svim građanima i sl.

Projekat se nastavlja u aprilu ove godine i trajaće do juna, kroz osam predavanja. Sam tok predavanja, vremenski raspored i izbor osme teme predavanja, ostavljeni su na odluku učesnicima programa.

U prethodnom ciklusu predavanja su završila dodjelom certifikata polaznicima. Ovom svečanom činom prisustvovali su i predstavnici OSCE-a na čelu sa šefom Ureda OSCE-a u Bihaću, gospodinom Farrukhom Islomovim. Prema njegovim riječima, projekat približavanja organa uprave građanima kroz veću informiranost o pravima i obavezama obje strane, pokazao se izuzetno kvalitetnim kada su u pitanju općine u BiH.

„Naravno, ocjenjujem da je Cazin podigao cjelokupnu ideju ovog pilot-projekta na nešto višu razinu i posebno sam sretan zbog toga. Isto tako, drago mi je da su predstavnici Općine Cazin odlučili uključiti ovaj projekat kao kontinuiranu aktivnost u svoju Strategiju komuniciranja. Cilj projekat će biti postignut ako polaznici budu prenijeli stečeno znanje i naučene informacije barem članovima svojih porodica i prijateljima. Iskreno vam želim svako dobro i puno sreće u budućem radu“, riječi su gospodina Islomova.



Nakon dodjele certifikata upriličeno je prigodno druženje u kabinetu općinskog načelnika, uz poklon tortu od uposlenika OSCE-a, partnera Općine Cazin u ovom projektu. Vjerujemo da ovakva i slična iznenađenja očekuju i ovogodišnje polaznike Akademije pa im ovim putem želimo mnogo uspjeha i rezultata u radu i druženju sa uposlenicima organa uprave naše općine.

Zajedno pomažemo više



261 prehrambeni paket sa osnovnim životnim namirnicama ukupne vrijednosti oko 26.000,00 KM, riječi su Saida Mujića, Pomoćnika načelnika Službe za civilnu i protiv požarnu zaštitu.

Od ukupne vrijednosti podijeljenih paketa OO Crvenog križa je izdvojila oko 1.800,00 KM, MZ Cazin 3.400,00 KM, MDD Merhamet 5.400,00 KM, Srce Cazina 2.000,00 KM, dok je ostatak sredstava i pakete obezbjedila Općina Cazin.

S obzirom na protekli zimski period kada je bilo proglašeno stanje elementarne nepogode na području cijele F BiH, u kojem su se realizirale koordinirane aktivnosti Općine sa humanitarnim organizacijama i drugim akterima, općinski načelnik Nermin Ogrješević održao je sastanak sa istima kako bi se analizirali učinci zajedničkih aktivnosti.

Općina Cazin, odnosno Služba za civilnu i protivpožarnu zaštitu, je na neki način koordinirala ove aktivnosti sa Centrom za socijalni rad, Crvenim križom, Merhametom, Udruženjem „Srce Cazina“, Mjesnim zajednicama, pa je ukupna ocjena ovih aktivnosti zadovoljavajuća u smislu obima i efekata.

„Ekstremno teški zimski uslovi su dodatno uzrokovali ionako tešku socijalnu situaciju mnogim porodicama, koje su u stanju socijalnih potreba, ali možemo da budemo veoma zadovoljni postignutim rezultatima. Svi akteri su dali maksimalni doprinos i možemo reći da je u ovom periodu podijeljeno ukupno



„Smatrao sam za shodno da nakon svih ovih aktivnosti danas napravimo jednu retrospektivu, kako bismo analizirali izvještaje i vidjeli kakvi su efekti urađenog.

Na temelju svega možemo reći da su akcije bile uspješne, da je bitno da postoji koordinacija u ovom sektoru socijalnog djelovanja, jer tada ostvarujemo najbolje efekte.

Naši planovi su da zadržimo ovu vrstu koordinacije i u budućem periodu, da uključimo širu javnost, sa generalnim ciljem da svi proaktivno djelujemo, otkrivamo teške slučajeve i pomažemo“, zaključio je načelnik Ogrješević.

april 2012. / broj XI



Završeni prvobitni radovi na uređenju gradskog parka

Prva faza projekta „Uređenje parka ispod zidina Starog grada Cazin“ uspješno je okončana u predviđenom roku. Vrijednost projekta je 165.000,00 KM, a zajednički su ga finansirali Općina Cazin sa 65.000,00 KM i Fond otvoreno društvo BiH sa 100.000,00 KM. Radove je izveo „KOV-GRAD“ Bužim, uz angažman 30 radnika sa evidencije Biroa rada Cazin, kojima je isplaćeno 51.000,00 KM, u čemu se ogleda i posebna vrijednost ovog projekta.

Izvršena je i primopredaja radova, kojoj su, ispred Fonda Otvoreno društvo BiH, prisustvovali gospodin Popović Bogdan koordinator projekta MILP BiH, nadzorni inženjeri gospođe Odobašić Nevenka i Dukić Slobodanka, zatim, ispred Općine Cazin općinski načelnik Nermin Ogrješević i općinski koordinator projekta Mujakić Ibrahim, ispred Biroa rada Cazin gospodin Ružnić Mustafa, predstavnik „KOV-GRAD“ Bužim gospodin Dizdarević Ibrahim i predstavnik MZ Cazin gospodin Šišić Sedin.

Primopredaja radova

Završetkom prve faze uređenja parka, Cazinjani su u strogom centru grada dobili miran i tih kutak, kojeg već svakodnevno koriste za šetnju, zajedničko slikanje i sl. Ono što posebno raduje jeste prisustvo djece i omladine. Dodatni kvalitet ovom projektu daje i to što pješaci, u nedostatku trotoara, mogu pješačkom stazom izbjeći dio jako prometne ulice.

Uz obećanje da će Općina Cazin nastaviti sa realizacijom ovog projekta u 2012. godini, preporučujemo da pogledate galeriju fotografija na web stranici Općine.



april 2012. / broj XI

Zbrinjavanje otpadnih voda kroz projekat „DECENT“

Dana 13.03.2012. godine u našoj je općini održan sastanak na temu implementacije novog projekta u oblasti zbrinjavanja otpadnih voda „DECENT“, koji zajedno finansiraju Vlada Švicarske putem SDC-a, Vlada Republike Slovenije i općine koje su odabrane od strane donatora, a to su Cazin, Bužim i Bihać.

Sastanku su prisustvovali direktor Švicarske agencije za razvoj i saradnju za BiH gospodin Joseph Guntern, gospodin Srećko Baijić iz Ureda za vezu SDC BiH Banja Luka, zatim Savjetnik za ekonomske poslove Ambasade R Slovenije u BiH gospodin Gregor Presker, gospodin Karl Werhle stručni konsultant iz Švicarske, direktor UNA CONSULTINGA Bihać gospodin Zulić Sandi sa saradnicima, a domaćin sastanku je bio načelnik općine Cazin Nermin Ogrješević.

Projekat DECENT je nastavak dobre saradnje općine Cazin sa SDC-om, ostvarene kroz Projekat GOV WADE, a u koji se uključila i Vlada R Slovenije kao donator. Naša općina je ponovo prepoznata kao dobar partner u implementaciji ovakvih projekata, a radi se o projektiranju i izgradnji decentraliziranog kanalizacionog sistema i biljnog uređaja za prečišćavanje otpadnih voda, za cca. 400 stanovnika. Za to su predviđena sredstva u iznosu od 360.000,00 KM, od čega će donatori i općina Cazin finansirati po 180.000,00 KM, a ukupna vrijednost projekta za sve tri općine se kreće oko 800.000,00 KM.



Donatori SDC i Vlada R Slovenije

Glavni ciljevi projekta DECENT su:

1. smanjivanje zagađenja vode u odabranim područjima uvođenjem novih tehnologija u opsežno prečišćavanje vode,
2. jačanje kapaciteta tri izabrane općine i kantonalnih vlasti za participativno planiranje decentraliziranih kanalizacionih sistema,
3. bolja održivost općinskih ulaganja,
4. razmjena iskustava i prenošenje znanja između slovenskih stručnjaka i lokalnih partnera iz BiH u oblasti decentraliziranog prikupljanja i prečišćavanja otpadnih voda i nekonvencionalnih tehnologija prečišćavanja (npr. biljni uređaji).

Zajednički je zaključak da treba nastaviti sa dobrom saradnjom, zatim da je implementacija projekta „DECENT“ zajednički interes svih prisutnih strana, kao model koji će poslužiti za replikaciju i na drugim područjima BiH i da je potrebno od samog početka provoditi aktivnosti na uključivanju javnosti u realizaciju ovog i sličnih projekata.

Na sastanku je također razgovarano o trenutnom stanju na izgradnji decentraliziranog kanalizacionog sistema i biljnog uređaja za prečišćavanje otpadnih voda u naselju Ljubijankići, realizaciji Operativnog plana za 2012. godinu. Nakon sastanka načelnik općine Cazin je sa gostima i saradnicima obišao dio gradilišta u naselju Ljubijankići, kao i lokaciju planiranog biljnog uređaja.

Započinje implementacija projekta centralnog kanalizacionog sistema općine Cazin

Sredstva koja je WBIF (Investicijski okvir za Zapadni Balkan) u iznosu od 700.000 eura nepovratnih sredstava dodjelio Općini Cazin koristiti će se za izradu neophodne studijsko-projektne dokumentacije za centralni kanalizacioni sistem i to:

- *feasibility studiju*
- *idejni projekat centralnog postrojenja za prečišćavanje otpadnih voda (PPOV)*
- *glavni projekti sekundarne kanalizacione mreže*

Općina Cazin je sa partnerima iz EBRD (Evropske banke za obnovu i razvoj) već izradila projektni zadatak za izradu feasibility studije, nakon čega je EBRD 03.01.2012. godine objavila poziv za izražavanje interesa za konsultante poslije čega će biti provedena procedura za izbor nosioca izrade feasibility studije.

Projekat izgradnje centralnog kanalizacionog sistema općine Cazin dobio je podršku i ORIO grant programa u iznosu od 3,6 miliona eura bespovratnih sredstava u okviru prvog poziva za dodjelu grant sredstava za 2011. godinu, a izvjesna je i finansijska podrška od Švedske agencije za razvoj (SIDA) i Evropske komisije (IPA fond).

Općina Cazin je 2006. godine izradila idejno rješenje glavnog kanalizacionog sistema za područje cijele općine, nakon čega je urađen glavni projekat glavnog i kanalizacionog kolektora od užeg gradskog jezgra do lokacije postrojenja u dužini od oko 16,5 km. Na pomenuti centralni kanalizacioni kolektor predviđeno je da se putem sekundarnih kolektora priključi najveći broj stanovnika i pravnih lica općine Cazin.

U okviru realizacije projekta uređenja Trga Alije Izetbegovića završen je jedan dio kanalizacionog kolektora u užem dijelu gradskog jezgra, a u toku 2012. godine nakon pribavljanja neophodnih saglasnosti, pristupit će se izgradnji prve etape glavnog kanalizacionog kolektora na dionici od „Žitarnice“ do „Čuprije“ u ukupnoj dužini 2.000 metara.

Važno je napomenuti još da je ukupna vrijednost ovog, za Općinu Cazin, kapitalnog projekta oko 25 miliona KM.

Deminirana lokacija Stari grad u Pećigradu

Dana, 24.08.2011. godine sa početkom u 13 sati izvršena je primopredaja deminirane lokacije Stari grad – put, u mjesnoj zajednici Pećigrad. Primopredaja se desila između izvođača radova, deminerske organizacije „Demira“ sa sjedištem u Orašju i predstavnika Civilne zaštite, odnosno lokalne zajednice. Radi se o projektu I kategorije sa općinske liste prioriteta deminiranja, ukupne površine 2.412 m², za koji je sredstva obezbjedila Njemačka humanitarna organizacija.

Mine i druga eksplozivna sredstva zaostala iz minulog rata predstavljaju stalnu opasnost po bezbjednost stanovništva, posebno određenih kategorija stanovništva kao što su djeca, poljoprivrednici, šumski radnici, izletnici i drugi. Na žalost, domaća vlast, svih nivoa, ne poklanja dovoljnu pažnju ovom problemu. Deminiranja su do nedavno finansirali uglavnom strani investitori. Međutim, u zadnje vrijeme oni svoja angažovanja u procesima deminiranja uslovljavaju učesćem domaće vlasti, koja još uvijek nema dovoljno sluha za probleme ove vrste.

Kada je u pitanju općina Cazin prema podacima RU BH MAC Bihać, ista je jedna od manje zagađenih općina sa zaostalim minama iz minulog rata, sa oko cca 2.000.000 m² zagađene površine. Također, prema podacima kojima raspolaže Služba za civilnu zaštitu, do danas je na općini Cazin očišćeno, odnosno deminirano, svega 191.730 m².

Međutim, treba naglasiti da je Općina Cazin prepoznala problem opasnosti od mina i u skladu sa svojim mogućnostima u budžetu obezbjedila 20.000,00 KM za deminiranje, dok je Vlada USK-a za ove potrebe planirala 100.000,00 KM. Na žalost, pomenuta sredstva još nisu upotrijebljena zbog inertnosti institucija zaduženih za deminiranje na nivou kantona. Općina Cazin, zbog toga, nije zadovoljna sa dinamikom deminiranja, kao ni sa izvršenom kategorizacijom projekata, ako se zna da je ista jedna od najgušće naseljenih općina, sa gustom mrežom naselja i infrastrukturnih objekata. Smatramo da bi sva zagađena područja trebala biti svrstana u I kategoriju ugroženosti od mina. U tom je pogledu lokalna zajednica u narednom periodu spremna redovno planirati budžetska sredstva za deminiranje, a također očekuje od institucija nadležnih za deminiranje na višim nivoima daleko veća angažovanja na području općine Cazin.

Energetska efikasnost u Općini Cazin

Općina Cazin jedna od 25 općina u BiH koje učestvuju u treninzima u okviru projekta DELTER koji je financiran od strane Evropske unije. Prvi ovakav trening održan je od 26. do 28. oktobra 2011. godine na Vlačiću gdje se govorilo o temama "Pokretanje i vođenje općinskih energetske projekata" i „Upravljanje projektima“. Do ljeta 2012. godine predviđeno je više treninga različite tematike iz sfere energetske efikasnosti i obnovljivih izvora energije. Eksperti predavači iz oblasti energetske efikasnosti i voditelji prvog treninga ispred DELTER-a bili su Oliver Spätgens i Davor Sušić. DELTER projekat je financiran od strane Evropske unije sa ciljem da se obezbijedi podrška Bosni i Hercegovini u ispunjavanju zahtjeva iz Ugovora o energetske zajednici JIE sa fokusom na energetske efikasnost i obnovljive izvore energije.

Jedan od preduslova za bolje upravljanje energijom i zaštitu okoliša je usvajanje zakonske regulative, kao i usaglašenih strateških i operativnih planova. U BiH je posljednjih godina napravljen veliki pomak u institucionalnom jačanju države i donošenju propisa iz oblasti održivog razvoja i zaštite okoline. Direkcija za evropske integracije je usvojila pristup BiH ka približavanju Evropskoj uniji za desetak oblasti, među njima i za okolinu. Po-

stoje entitetski zakoni o zaštiti okoliša, te odgovarajuća entitetska tijela koja se bave kontrolom stanja u ovoj oblasti sa aspekta primjene postojećih zakona. Osim zakona, usvojen je i međuentitetski Nacionalni plan aktivnosti u oblasti okoliša za BiH (NEAP).

Vežano za ovu oblast, Općina Cazin ima usvojen Strateški plan za vode, zaštitu okoliša i komunalnu djelatnost, a u toku je i izrada Lokalnog akcionog plana za životnu sredinu (LEAP). Isto tako, Općina Cazin jedna od 30 izabranih općina u BiH kojoj će UNDP pružiti podršku pri izradi LEAP-a u okviru MDG-F programa za Očuvanje okoliša i klimatske promjene.

Općina Cazin samnjuje emisiju štetnih gasova u svojoj okolini



Dana 05.01.2012. godine u Cazinu je potpisan ugovor o partnerstvu između Općine Cazin i UG „Nešto više“ iz Sarajeva, a riječ je o implementaciji projekta „Unapređenje sistema centralnog zagrijavanja zgrade općine Cazin“, u vrijednosti od 70.000,00 KM. Projekat zajednički finansiraju UNDP-a BiH (United Nations Development Programme) i Općina Cazin, u jednakom iznosu od po 35.000,00 KM. Ugovor su potpisali, u ime Općine općinski načelnik Nermin Ogršević, a u ime UG „Nešto više“ direktor Aleksandar Bundalo.

Ovaj projekat je konkretan rezultat ulaska naše Općine u Program MDG-F (Zaštita životne sredine i klimatske promjene), tačnije „Standardizacija upravljanja okolišem: povezivanje lokalnih i državnih inicijativa u BiH“, koji se u

BiH implementira zajednički od strane pet UN agencija (UNDP, UNEP, UNESCO, FAO i UNV). Do zajedničke saradnje na ovom projektu došlo je nakon što je UNDP BiH, u okviru programa MDG-F, raspisao Javni poziv za nevladine organizacije, za podnošenje prijedloga projekata u sektoru zaštite životne sredine, okoliša i klimatskih promjena, u općinama koje su pristupile izradi Lokalnog ekološkog akcionog plana (LEAP). Potom je nevladina organizacija „Nešto više“ iz Sarajeva prepoznala Općinu Cazin kao kvalitetnog partnera za implementaciju projekata u toj oblasti. Uputili su poziv za saradnju, što je rezultiralo zajedničkim projektom. Ova ideja ima za cilj povećanje energetske efikasnosti i smanjenje emisije štetnih gasova u našoj Općini, zamjenom peći za centralno gri-

janje, koja koristi loživo ulje, sa peći koja kao gorivo koristi bio-masu (pelet). Projekat je prvi te vrste na području naše općine, a njegovom realizacijom Općina Cazin će dati doprinos u globalnoj borbi protiv klimatskih promjena, odnosno smanjenju emisije gasova sa efektom staklene bašte.

Načelnik Ogršević je prilikom potpisivanja Ugovora istaknuo da se radi o projektu koji ima poseban značaj za našu općinu, jer predstavlja prvi projekat u području energetske efikasnosti, što će biti budućnost kako naše zemlje, tako i ostatka svijeta. „Mislim da su građani informisani da se radi o projektima koji su posebno subvencionirani i od strane EU, jer se većina

Spas Agrokomerca u ponovnom pokretanju proizvodnje

politika u oblasti okoliša temelji upravo na ovakvim i sličnim postavkama. Smatram da živimo u vremenu koje ima potrebu za uštedom energije i njenom racionalnijom potrošnjom, zbog čega smo i mi odlučili dati svoj doprinos ovim projektom“, izjavio je načelnik Ogršević.

Koordinator Općine Cazin za izradu LEAP-a, Ibrahim Mujakić, pojasnio je konkretne aktivnosti predviđene ovim projektom. „U prvoj fazi idemo na zamjenu peći za grijanje sa lož ulja na pelet, jer smo izračunali da je ušteda u energiji i potrošnji velika. Drugi efekat je smanjenje zagadjenja okoline, a treći efekat se ogleda u isplativosti investicije u roku od godinu i po dana“, rekao je, između ostalog, koordinator Mujakić.



Početkom februara ove godine u Velikoj Kladuši u prostorijama uprave Agrokomerca održan je sastanak na temu analize radnog materijala koji je urađen kao osnova za **Program mjera sanacije Agrkomerc d.d. Velika Kladuša**. Sastanku su pored predstavnika menadžmenta Agrokomerca prisustvovali i federalni ministar energetike, rudarstva i industrije Erdal Trhulj, premijer USK-a Hamdija Lipovača, sa nekolicinom ministara u Vladi USK-a, kao i načelnici općina Cazin i Velika Kladuša Nermin Ogršević i Admil Mulalić, te predstavnik općine Bužim.

Prisutni su se složili da je postojeće stanje neodrživo i da je neophodno što prije pristupiti realizaciji konkretnih aktivnosti u pravcu pokretanja održive proizvodnje.

Prema riječima ministra Trhulja, u narednom periodu biće pokrenute konkretne aktivnosti na spašavanju Agrokomerca i sudbine njegovih radnika. On također smatra da se u dalje procese trebaju uključiti svi vlasnici Agrokomerca, Udruženje dioničara i nadležna vada. „**Bitno je da se ovaj put zaista pokrenu konkretna rješenja, budući da su dosadašnji sastanci rezultirali nesuspjehom. Ne želimo da se to ponovi. Sada su svi maksimalno zainteresirani da se osigura minimalno pokretanje proizvodnje i konkretan gotovinski tok. Riječ je o dvije fabrike i 120 radnika. U konačnici, biće neophodno riješiti pitanje svih sedam fabrika i preko 400 radnika, kako bismo mogli govoriti o održivoj proizvodnji**“.

rekao je ministar Trhulj. „Vlada FBiH priprema Zakon o konsolidaciji privrednih društava, koji će tretirati i državna, privatna, ali i mješovita preduzeća, kao što je i Agrokomerc. Tim Zakonom će se konkretno definisati na koji način će doći do izmirenja dugova, a drugim zakonskim rješenjima će se rješavati pitanje uvezivanja staža i sl.“, dodao je ministar Trhulj.

Učesnici sastanka su jednoglasno odlučili da prodaja trenutno nije rješenje, nego da se ide u iznajmljivanje određenih objekata, do konačnog definisanja pitanja vlasništva na Sudu u Strasburgu. Svi su iskazali zahvalnost što se sadašnja uprava riješila negativnih ugovora koje je Agrokomerc imao, što je napravila evidentiranje većine imovine i što je napravljen spisak imovine kojom Agrokomerc raspolaže u inostranstvu, a koja se nalazi u pasivnom podbilansu.

Značajne površine zemljišta i pogona nalaze se i na području naše općine. Zbog toga postoji veliki interes općine Cazin da učestvuje u rješavanju ovog problema. Prvi čovjek naše općine smatra da država, kao većinski vlasnik, u prethodnom periodu nije pokazala mogućnost da kvalitetno upravlja ovim preduzećem i da su propuštene veoma dobre prilike za saniranje problema proizvodnje i radnog staža uposlenika.

„**Mi smo također zainteresirani za mogućnost povrata određenih kapaciteta općini, koji bi se u konačnici stavili u funkciju naših razvojnih planova**“, rekao je načelnik Ogršević.

Održana Glavna javna rasprava o Nacrtu Odluke o dimnjačarskoj djelatnosti



Prvog dana mjeseca februara u općinskoj vijećnici održana je Glavna javna rasprava o Nacrtu Odluke o dimnjačarskoj djelatnosti. Organizator javne rasprave je u uvodnom dijelu upoznao prisutne o rezultatima javne rasprave koja je provedena na područjima mjesnih zajednica, o pristiglim prijedlozima i sugestijama i o svim radnjama koje je organizator poduzeo u cilju provođenja predmetne javne rasprave.

Na osnovu provedene Glavne rasprave, odnosno svih prijedloga, sugestija i mišljenja učesnika može se zaključiti da je Nacrt Odluke o dimnjačarskoj djelatnosti bio dobar materijal i da je bilo dosta dobrih, konstruktivnih prijedloga koji se odnose na: način plaćanja dimnjačarskih usluga u zgradama kolektivnog stanovanja, pronalaženje rješenja za individualne objekte u cilju samo-

kontrolisanja čišćenja i održavanja dimovodnih objekata od strane vlasnika, preciznijeg regulisanja rokova za čišćenje dimnjaka, uključivanje u nadzor nad provođenjem Odluke i građevinsku inspekciju za zaštitu od požara, predviđanje manjih novčani kazni i drugo.

Organizator javne rasprave je zadovoljan obimom i načinom provođenja iste, a ujedno je ostavio i mogućnost da druga zainteresirana pravna i fizička lica mogu dostavljati svoje prijedloge i sugestije do zaključenja rasprave.

Obaveza organizatora rasprave je da, nakon zaključenja iste, a na osnovu svih dobrih i kvalitetnih prijedloga koji ne budu u suprotnosti sa zakonskim propisima, uradi Prijedlog navedene odluke i istu dostavi Općinskom vijeću na razmatranje i usvajanje.



Održana Glavna javna rasprava o Nacrtu Odluke o odvodnji i prečišćavanju otpadnih voda

Dana 08.02.2012. godine, u prostorijama Vijećnice općine Cazin, prema Zaključku Općinskog vijeća Općine Cazin od 23.11.2011. godine, održana je Glavna javna rasprava o Nacrtu Odluke o odvodnji i prečišćavanju otpadnih voda na području općine Cazin. Odaziv zainteresiranih građana, predstavnika mjesnih zajednica i javnih ustanova bio je dobar. Javnu raspravu su vodili, ispred Službe za urbanizam i zaštitu okoliša Općine Cazin Mujakić Ibrahim, te ispred JKP „Vodovod“ Šerif Kaljiković i Mirhad Pjanić.

U uvodnom dijelu Mujakić Ibrahim je upoznao prisutne sa zakonskim osnovama, sadržajem i nadležnostima koje proizilaze iz Nacrta Odluke.

Održana javna rasprava protekla je u konstruktivnom dijalogu prisutnih. Voditelji rasprave su odgovarali na pitanja o pojedinim dijelovima Odluke i stavili se na raspolaganje za sva dodatna pojašnjenja.

Javna rasprava o Nacrtu LEAP-a općine Cazin



Voditelji javne rasprave



Učesnici javne rasprave

U prostorijama Vijećnice općine Cazin dana 22.02.2012. godine, prema zaključku Općinskog vijeća općine Cazin od 12.01.2012. godine, održana je Glavna javna rasprava o Nacrtu Lokalnog ekološkog akcionog plana (LEAP) općine Cazin 2012-2017. Javnu raspravu je vodio, ispred Radne grupe za izradu LEAP-a, Mujakić Ibrahim. Istoj su prisustvovali predstavnici MZ Cazin, Mutnik i Slatina, predstavnici nadležnih općinskih službi i nažalost jako mali broj građana.

Voditelj javne rasprave je prisutne upoznao sa osnovnim postavkama LEAP-a, metodologijom izrade, načinom provođenja i monitoringa. Odgovarao je na pitanja o pojedinim dijelovima ovog dokumenta i pojasnio sve istaknute dileme. Nacrt ovog dokumenta bio je dostupan građanima na web stranici Općine, kao i u Centru za pružanje usluga građanima. Zainteresirani su svoje primjedbe, prijedloge i sugestije mogli poslati u pisanoj formi nadležnoj općinskoj službi, kao i u slučaju svake javne rasprave.

Veliki odaziv

na javnoj debati u Cazinu

U općini Cazin je 19. januara 2012. godine održana javna debata na temu „Jačanje kapaciteta lokalne zajednice s ciljem ispunjavanja uvjeta u procesu pridruživanja Bosne i Hercegovine Evropskoj uniji“. Ovu debatu je organizirao Centar za sigurnosne studije BiH u saradnji sa Općinom Cazin, a na istoj su kao partneri i predavači bili prisutni i predstavnici Delegacije Evropske unije u BiH i Direkcije za evropske integracije BiH.

Među prisutnima su, između ostalih, bili i zvaničnici općinske vlasti, predstavnici OSCE-a, predstavnici nevladinog sektora i drugi zainteresirani građani, koji su mogli čuti dosta korisnih informacija o EU, pridruživanju BiH ovoj zajednici, uslovima koje mora ispuniti na ovom putu, o ekonomskim i socijalnim prednostima članstva, predpristupnim fondovima i sl. Težište razgovora bila je lokalna zajednica i sve veći interes stranih organizacija i donatora da sarađuju upravo sa ovim nivoom vlasti.

Velika posjeta na debati



Kržalić Armin, projekt direktor Centra za sigurnosne studije BiH, ovom prilikom je izrazio svoje zadovoljstvo zbog implementacije projekta „Euphoria“ u Cazinu, koji ima za cilj da podigne svijest općinskih zvaničnika i vijećnika, mladih, ali i drugih građana o samom putu Bosne i Hercegovine ka Evropskoj uniji, odnosno obavezama koje su pred nama i koje moramo ispuniti ako želimo da postanemo punopravna članica EU. „Do sada smo imali javne debate u Bosanskoj Krupi i Bihaću. Održali smo predavanja mladima u Gimnaziji u Cazinu i Krupi, te na Pravnom fakultetu u Bihaću“, rekao je gospodin Kržalić. Dodao je i to da ovaj projekat pokušava približiti EU svakom čovjeku u BiH, a lokalna zajednica je svakako najbliža institucija za zadovoljavanje njihovih potreba i prava pa se debata bavi upravo tim temama.

Goste je pozdravio predsjedavajući OV i poželio im dobrodošlicu u Cazin. Napomenuo je da su ove teme od velike važnosti za naše područje s obzirom da graničimo sa R Hrvatskom koja će iduće godine biti članica EU i time će nam direktno kucati na vrata.

EU kao takva i njene institucije ne bave se direktno lokalnom zajednicom, ali su zato omogućili institucijama i nevladinom sektoru da apliciraju za određena sredstva iz raspoloživih fondova, čime ih potiču na dalji razvoj, izgradnju vlastitih kapaciteta i stvaranje kvalitetnije klime za život građana.

„Prema tome, važno je da iskoristimo ono što nam je omogućeno i da se kvalitetno pripremimo za procese koji nam slijede. Jako je korisno da se odvijaju ovakve debate i da ljudi pokazuju interes za ove teme. Trudićemo se da maksimalno uključimo lokalnu zajednicu u ovakve i slične projekte i da im obezbijedimo što više neophodnih informacija“, rekao je projekt menadžer Delegacije EU u BiH Džemal Hodžić.



U Cazinu održan seminar „Istraživanje inostranih tržišta“



U prostorijama Vijećnice općine Cazin održan je seminar „Istraživanje inostranih tržišta-Izvori informacija i šta trebate znati“ u sklopu Programa podrške razvoju i promociji izvoza u Bosni i Hercegovini (EUEXPRO 2), a u saradnji sa Vanjskotrgovinskom komorom BiH i Institutom za edukaciju ECOS. Ovaj program je osmišljen na način da pruži praktičnu obuku BiH kompanijama o tome kako provesti istraživanje tržišta, s ciljem identificiranja izvoznih prilika. Težište edukacije odnosilo se na otkrivanje mogućnosti za razvoj učinkovitije strategije izvoznog marketinga i natjecanja na međunarodnom tržištu.

Prema riječima načelnika Ogrševića edukacija ove vrste je uvijek dobro došla, jer se u današnje vrijeme moramo orjentisati na sva raspoloživa tržišta, posebno ona u EU, pa su sve informacije za uspješniji plasman naših proizvoda uvijek dobrodošle. „Moramo upoznati pravila igre na međunarodnom planu. Na području općine Cazin imamo dosta uspješnih privrednika u nekoliko sektora i vrlo je važno da oni svoje firme i svoje proizvode izvedu na evropsko tržište“, rekao je načelnik.

„Ovaj seminar se održava u sklopu projekta EUEXPRO 2 i vezan je za istraživanje stranog tržišta, a njegovu realizaciju omogućila je Vanjskotrgovinska komora BiH u saradnji sa Evropskom unijom. Ovakve vrste prezentacija i programa održavane su u mnogim gradovima diljem Bosne i Hercegovine, poput Sarajeva, Mostara, Tuzle, Banja Luke i Cazina. Fokus ovih seminara predstavljaju mala i srednja preduzeća, kroz koje se nastoji pokazati šta su mane, a šta prednosti malih i srednjih preduzeća i šta ih konkretno očekuje na evropskom tržištu. U okviru ovog seminara prisutni su imali priliku da na jednom mjestu čuju puno dobrih i kvalitetnih informacija i praktičnih primjera naših uspješnih, domaćih firmi koji su ostvarili zavidne rezultate u izvozu proizvoda, ne samo na evropskom tržištu nego i šire, a kroz koje ostala preduzeća mogu unaprijediti svoj rad i proširiti se na međunarodno tržište“, istaknuli su treneri na ovom seminaru.



Predavači

Obuku su vodili treneri s višegodišnjim iskustvom u izvoznom marketingu, istraživanju tržišta i poslovnom savjetovanju kao i planiranju, Edin Salihbašić i Zoran Vuković.

Učesnici treninga



Edukacija o uzgoju jezgrastog voća

Služba za razvoj i poduzetništvo Općine Cazin u saradnji sa Ministarstvom poljoprivrede, vodoprivrede i šumarstva USK organizirala je stručno predavanje na temu „Podizanje nasada jezgrastog voća: ORAHA, LIJESKE i PITOMOG KESTENA. Predavanje je održao prof. dr. Željko Prgomet, redovni

profesor Veleučilišta u Poreču. Svi voćari koji su izrazili interes za podizanje novih trajnih nasada jezgrastog voća, njih 50, prijavljenih u Službi za razvoj i poduzetništvo krajem 2011. godine, prisustvovali su navedenom predavanju, a bilo je i onih koji su zbog znatizelje slušali ovu iznimno interesantnu temu.

Od ukupno 17,84 hektara, ili 178,4 dunuma, poljoprivrednici su iskazali najveći interes za sadnju oraha na površini od 11,8 ha, zatim pitomog kestena na 4,5 ha i lijeske na 1,54 ha. Ova edukacija proizvođača je prvi korak u realizaciji najavljenog Projekta od strane resornog kantonalnog ministarstva istaknuo je njihov predstavnik gospodin Davor Šimić, dipl. ing. voćarstva. Tokom godine očekivati je nastavak aktivnosti na navedenu temu, a podizanje prvih nasada pod nadzorom struke, kako nalaže najavljeni Projekat, može se očekivati na jesen ove godine.



Održano predavanje za potencijalne proizvođače jagodastog voća

Organizaciji Poljoprivrednog zavoda Unsko-sanskog kantona, međunarodnog projekta „FARMA“ i Službe za razvoj i poduzetništvo Općine Cazin, dana 15.03.2012. godine u Domu kulture Cazin održana su edukativna predavanja za zainteresirane proizvođače jagodastog voća. Referat na temu „**Osnovne pomotehničke i agrotehničke mjere kod jagodastih voćnih vrsta sa akcentom na rezidbu/prorjeđivanje (proljetno čišćenje)**“ održao je prof. Adnan Maličević dir.gen banke za biljne resurse Poljoprivrednog fakulteta Sarajevo. Zainteresirani slušaoci nakon teoretskih predavanja imali su priliku da prisustvuju praktično – pokaznim vježbama na odabranim zasadima voća gdje su demonstrirane vježbe iz rezidbe odnosno proljetnog čišćenja zasada različitog jagodastog voća.



Veliki odaziv predavanju

Održavanje seminara za proizvođače jagodastog voća na području općine Cazin samo je početak onog što Služba za razvoj i poduzetništvo planira uraditi u 2012. godini za navedene proizvođače kako bi isti lakše i kvalitetnije odžavali svoje zasade. Kolika je zainteresiranost proizvođača jagodastog voća na području općine Cazin za znanjem koje im je potrebno, kako bi uredno i kvalitetno održavali svoje zasade, pokazala je i njihova prisutnost na navedenom predavanju. Odazvala su se čak 104 poljoprivredna proizvođača jagodastog voća te predstavnici Udruženja jagodastog voća i povrća općine Cazin.

IV DOGODILO SE U OPĆINI CAZIN

Izbor sportiste općine Cazin za 2011. godinu

Sportski savez općine Cazin u saradnji sa Općinom i ove je godine organizirao svečanost povodom izbora najboljih sportista za prethodnu godinu. Ovogodišnjoj svečanosti su pored predstavnika SS naše općine, prisustvovali i predstavnici SS USK-a, predstavnici općine Cazin na čelu sa načelnikom Nerminom Ogřeševićem, predstavnici LOT tima iz Rumunije, te mnogi drugi sportaši, gosti, prijatelji sporta i roditelji naših uspješnih sportista.

Načelnik Ogřešević se zajedno sa predsjednikom SS Emir Dautovićem zahvalio svim prisutnima što su uveličali ovogodišnju svečanost za izbor najboljih sportista naše općine i izrazio spremnost Općine Cazin da i dalje finansira naše sportaše i izgrađuje infrastrukturu za bolju sportsku atmosferu i buduće uspjehe.

Za najboljeg sportistu u protekloj, 2011. godini, izabran je **Begić Ervin**, član TDK „Bosna-Đemo“, koji je osvojio treće mjesto na Evropskom prvenstvu održanom u Bratislavi. Priznanje su mu uručili načelnik općine Nermin Ogřešević i predsjednik SS općine Cazin Emir Dautović.

Ovogodišnje priznanje za životno djelo dobili su sportski radnici sa višegodišnjim iskustvom **Misaljević Bećir i Alagić Meho**, dok su nagrade za pomoć i doprinos u razvoju



Uspješni sportisti

sporta dobili **Općina Cazin, SS USK**, te firme doo „**ISIA**“ Cazin i doo „**I-Selimović**“ Cazin. Plakete za promociju sporta ove godine su dobili **Edin Alagić**, novinar USK novina „Krajina“, **JU „Dom kulture“** Cazin, te **Ljubijankić Sanel** za rad sa mladima.



Enigma

Izbor sportiste 2011

Nagradu za najuspješniju ekipu u invalidnom sportu u muškoj konkurenciji dobila je malonogometna ekipa SSRI, a u ženskoj konkurenciji najbolja je bila ženska atletska ekipa SSRI, dok je u kategoriji ostalih sportova u ženskoj konkurenciji nagradu dobio **SPK „Enigma“**, a u muškoj konkurenciji **AMK „Cazin“**. U loptačkim sportovima u ženskoj konkurenciji nagradu je osvojila ekipa **ŽRK „Krajina“ Cazin**, dok je u muškoj konkurenciji nagradu odnijela ekipa **NK „Krajina“ Cazin**.

Na ovogodišnjoj manifestaciji nagrade su još dodjeljene najuspješnijim trenerima, kadetima, juniorima i seniorima.



U Cazinu se održao dječiji turnir u malom nogometu

U Cazinu je za vikend, 03. i 04. marta 2012. godine, odigran treći po redu malonogometni međunarodni turnir „Djeca Bosne“. Ova sportska manifestacija iz godine u godinu okuplja stotine mališana koji se takmiče u dvije kategorije (U-10 i U-12). Ove godine je na turnir prijavljeno 29 ekipa iz Bosne i Hercegovine, Hrvatske i Austrije. Organizatori ovog tradicionalnog sportskog skupa su JU „Sportski centar“ i Sportski savez općine Cazin uz pokroviteljstvo Općine. Inicijatori turnira su i naši ljudi iz dijasore koje je vodila ideja povezivanja i međusobnog upoznavanja djece.

Manifestacija se svake godine organizira i kao humanitarni projekat putem kojeg se pomaže djeci iz socijalno ugroženih porodica. Ove godine je petero takve djece dobilo novčani prilog u iznosu od 100,00 KM.



Učesnici turnira

Turnir se odigrava tokom subote i nedjelje, a na svečanom otvoru, pored blizu 400 učesnika, okupio se i veliki broj njihovih roditelja i građana. Samu svečanost uveličali su i predstavnici PK Enigma sa svojim plesnim i folklornim koreografijama.

Prisutnima je dobrodošlicu poželio predsjednik SS Cazin Dautović Emir. Prema njegovim uvodnim riječima, turnir je opravdao svoje postojanje zbog velikog broja učesnika, što znači da vrijedi nastaviti sa organizacijom istog i u narednim godinama. Turnir je zvanično otvorio prvi čovjek naše općine. U svom obraćanju posebno se zahvalio na humanim gestama i jednoj pozitivnoj ideji u kojoj djeca daruju svoje vršnjake i na taj način se uče pomagati onima koji su u nevolji.

PS Enigma

april 2012. / broj XI



Radna akcija čišćenja centra

VELIKE SNIJEŽNE padavine nisu ometale život u centru našeg grada

Općinski načelnik Nermin Ogršević je 05. februara održao radni sastanak sa predstavnicima javnih preduzeća i CZ sa ciljem definisanja stanja na području naše općine, nakon proglašenja elementarne nepogode od strane Vlade FBiH. S obzirom da su bile najavljene nove padavine, načelnik Ogršević je naložio da se pokrenu dodatne aktivnosti na raščišćavanju postojećeg snijega i čišćenju pješačkih i putnih komunikacija. U tom kontekstu bio je dogovoren i angažman 15 ljudi sa Biroa za nezaposlene, što je postala praksa naše Općine kroz različite projekte i aktivnosti. Sredstva za ovu namjenu izdvojena su iz općinskog budžeta.



Sniježni Cazin

Pored toga JKP-a je obezbjedilo dodatne kapacitete, kako bi se u što kraćem roku rasčistio i odveo snijeg iz užeg centra grada, gdje je i inače najveća frekvencija ljudi. Prema izvještajima sa terena, konstatirano je da su putevi u najvećem dijelu naše općine bili prohodni.

Cazin dobio volonterku godine

Općinski načelnik Nermin Ogršević 17.12.2011. godine u svom je kabinetu upriličio prijem za delegaciju Crvenog križa na čelu sa predsjednikom Crvenog križa USK-a Huseinom Huskom Kličićem. Povod za ovaj susret bila je dodjela priznanja volonterima Crvenog križa i izbor volontera godine u FBiH. Od 80 dodijeljenih priznanja, čak devet ih je otišlo u Cazin, među kojima i priznanje za volontera godine. Ove godine, tu je titulu zasluženo ponijela naša sugrađanka Emina Sabljaković.

Nakon što je načelniku prezentirao neke od aktivnosti Crvenog križa realizirane u toku ove godine, s posebnim osvrtom na saradnju sa učenicima osnovnih i srednjih škola, gospodin Kličić je zahvalio Općini Cazin i općinskom načelniku na nesebičnoj podršci njihovom radu u proteklom periodu. „Ističem važnost saradnje sa lokalnom zajednicom i njenim predstavnicima, jer na toj osnovi svaka akcija Crvenog križa dobija na većem značaju. Izuzetno sam zadovoljan rezultatima rada Crvenog križa Cazin, o čemu svakako govore i priznanja koja smo dobili na obilježavanju Dana volontera“, riječi su Huseina Kličića.

„Priznanja ovakve vrste su najbolja promocija naše sredine i ljudi koji ovdje žive. Posebno mi je drago ako takva priznanja znače angažman ljudi u projektima volonterizma koje polako dobija na značaju i u našoj zemlji. Zaista se mora pohvaliti kontinuiran i predan rad volontera i članova Crvenog križa Cazin. Zbog socijalne dimenzije projekata koje oni realiziraju Općina Cazin će uvijek biti njihov partner i pružiti im maksimalnu podršku“, riječi su načelnika Ogrševića koje je uputio svojim gostima nakon što je čestitao na priznanjima koja su donijeli u našu općinu.

Volonterka godine FBiH Emina Sabljaković zahvalila se na prijemu i podršci koju općinski načelnik pruža u svakodnevnim aktivnostima CK Cazin, dodajući da će i u narednom periodu nastaviti sa volonterskim radom u Crvenom križu. Istaknula je da se ovakva humanost treba posebno njegovati u toku iduće godine, koja je proglašena godinom solidarnosti.

april 2012. / broj XI



Svečano u Domu kulture



Načelnik Ogrješević

Supervizija implementacije projekta IFAD u Cazinu

Cazinjani obilježili Dan nezavisnosti BiH

Uoči velikog praznika naše države u velikoj sali Doma kulture održana je svečana akademija kojom se tradicionalno dočekuje 1. mart, Dan nezavisnosti naše domovine. Patriotskoj obavezi odazvao se veliki broj građana i građanki, čime smo potvrdili našu opredjeljenost da ovdje, u najzapadnijem njenom dijelu, očuvamo tekovine jedinstvene, demokratske, suverene BiH.

Prigodnim programom obilježeno je dvadesetogodišnje postojanje naše zemlje kao samostalne države. Ovoj svečanosti prisustvovao je i veliki broj ljudi iz javnog i političkog života naše općine i naših predstavnika na višim nivoima vlasti. Bili su tu i predstavnici IZ Cazin, profesori, doktori, ljudi od nauke, ali i oni koji svojom igrom, pjesmom i muzikom posebno uveličaju ove praznike.

Na samom početku članovi KUD Hasan Mujezinović izveli su neke od svojih novih plesnih koreografija, a potom su nas gracioznim kretanjama nanovo iznenadili plesni parovi kluba Enigma. Svoj doprinos ovom događaju dali su i mladi cazinski tamburaši, koji već dvije godine djeluju pod vodstvom legendarnog tamburaša Huseina Tatarevića Sene.



Mladi cazinski tamburaši

Nakon prigodnog govora načelnika Ogrješevića, koji je podsjetio prisutne da je obilježavanje ovih datuma obaveza svih nas i to ne iz prkosa ili zlobe, već iz čiste prirodne, ljudske i patriotske potrebe koju srcem ispunjavamo. „**Upravo smo mi Krajišnici, ljudi koji žive u najzapadnijem dijelu BiH, dokaz da se svaka nevolja može pobijediti kada smo zajedno**“, riječi su načelnika Ogrješevića. Pozvao je na zajedništvo, toleranciju i suživot u izgradnji prosperitetne, evropske BiH, izgrađene po mjeri svih njenih građana i građanki.

Da ovaj događaj ostavi i poneku uspomenu pobrinuo se cazinski slikar Nurija Ljubijankić. Svojom samostalnom izložbom uljepšao je zidove galerije Doma kulture, a nadamo se i zidove pokojeg cazinskog doma. Samu izložbu otvorio je prvi čovjek naše općine, a o umjetničkom radu i vrijednosti ovih djela govorio je poznati krajiški umjetnik Sead Emrić.



Slika Nurije Ljubijankića



Nurija Ljubijankić

Krajem novembra prošle godine u kabinetu općinskog načelnika boravili su predstavnici projekta IFAD na čelu sa direktorom IFAD-a za BiH Abdelazizom Merzoukom i konsultantima projekta Auram Luka, Tamara Nicodeme i Denise Butnaru. U pratnji delegacije su bili i direktor Jedinice za implementaciju projekta dr. Halil Omanović i koordinator projekta za USK-a mr. Smail Toromanović. Kako su istaknuli gosti, ova posjeta je u formi supervizije implementacije projekta u svim njegovim oblastima.

„Ovdje smo zajedno sa kolegama iz Ministarstva poljoprivrede da sagledamo trenutno stanje implementacije projekta, koji se realizira putem Jedinice za implementaciju pri Federalnom ministarstvu za poljoprivredu, vodoprivredu i šumarstvo. Ovo je već četvrta godina implementacije projekta i vrijeme je da vidimo njegove rezultate. Zadovoljni smo dosadašnjim tokom projekta i vrlo sretni što smo se sreli sa poljoprivrednim proizvođačima koji su direktni korisnici ovog projekta“, riječi su direktora Merzouka.

Do sada je na području našeg kantona investirano preko 11 miliona KM od čega je 4 miliona KM grant sredstava za različite projekte, a koji su u funkciji razvoja ruralnih područja. Na području općine Cazin, IFAD je investirao preko 580.000,00 KM grant sredstava za podršku lokalnim infrastrukturnim projektima, udruženjima poljoprivrednika, edukativnim aktivnostima, organizaciji sajmova itd. Zatim, 1,3 miliona je plasirano kreditnih sredstava za razvoj malih i srednjih prerađivačkih kapaciteta. Prema riječima mr. Toromanovića, ova posjeta je imala za cilj utvrditi stanje na terenu i krajnje efekte koji su ostvareni projektom kod njegovih primarnih korisnika.



Sastanak u kabinetu



Delegacija IFAD-a

Općina Cazin i njeni predstavnici zadovoljni su dosadašnjom saradnjom sa IFAD-om. Posebna vrijednost ovog projekta ogleda se svakako u zajedničkom radu i partnerskom odnosu Općine, IFAD-a i samih građana. Vodeći se riječima prvog čovjeka naše općine, IFAD je olakšao procese završetka mnogobrojnih infrastrukturnih projekata na području naše općine i jako je važno da su u nekim segmentima saradivali direktno sa poljoprivrednim proizvođačima. „**Iznimno sam sretan da su naši timovi bili na visini zadatka u ovom projektu i da smo se pokazali kao ozbiljan partner. Zato vjerujem da predstavnici IFAD-a, ali i sami građani mogu računati na nas i u budućem periodu**“, riječi su načelnika Ogrješevića.

Cazin nastavlja saradnju sa turskim općinama

Krajem prvog mjeseca 2012. godine općinski načelnik Nermin Ogrješević je, na poziv načelnika istanbulske općine Şile, boravio u višednevnoj radnoj posjeti ovoj općini i gradu Istanbulu. Kao što je poznato nedavno je boravila delegacija ove općine u Cazinu, gdje je i dogovoreno bratimljenje dvije općine, o čemu se očitovalo i OV-e sa Odlukom o bratimljenju.

U okviru ove posjete upriličen je prijem u zgradi općine Şile, a tom prilikom je i zvanično uručena Odluka o bratimljenju i razmjenjeni pokloni dvojice načelnika. Načelnik Ogrješević je u društvu domaćina obišao zgradu Općine i upoznao se sa određenim specifičnostima rada i nadležnostima lokalne zajednice u Turskoj, a potom je za goste iz Bosne upriličena zajednička večera sa vijećnicima OV-a Şile.

Narednog dana organiziran je obilazak bošnjačkog sela Yeni Koy, koje broji oko 600 stanovnika. Tu su gosti razgovarali sa mještanima o njihovim svakodnevnim poslovima i potrebama. U večernjim satima organizirana je javna tribina o Bosni i Hercegovini, na kojoj je predavanje održao profesor Talhe Ugurluel, a prisustvovalo joj je nekoliko stotina Bošnjaka i Turaka, kojima se također obratio i načelnik Ogrješević.



Uručena odluka o bratimljenju

U petak, 20. januara, organiziran je prijem kod guvernera grada Istanbula, Huseyina Avni Mutlua, kojeg je načelnik Ogrješević upoznao sa stanjem u Bosni i Hercegovini općenito, ali i sa specifičnostima općine Cazin. Guverner je pokazao veliki interes za stanje u BiH i spremnost za razvijanje saradnje u različitim oblastima. U poslijepodnevnim satima organiziran je obilazak Topkapi palače koju se zajednički posjetili načelnik Istanbula, Mekke, Cazina i Şilea.



Susret načelnika Ogrješevića i guvernera Mutlua

Idućeg dana načelnik Ogrješević posjetio je Udruženje privrednika „Tumsiad“. Ugostio ga je Yasin Ceyhan, generalni sekretar ove asocijacije, koja u Turskoj okuplja preko 14.500 privrednih subjekata različitih djelatnosti. Razgovarano je o mogućnostima privredne saradnje i investiranja turskih firmi na području općine Cazin. Nakon toga organiziran je prijem kod gradonačelnika Istanbula, Kadira Topbaša, koji je u razgovoru sa načelnikom Ogrješevićem istaknuo namjeru za razvijanjem privrednih, kulturnih i drugih prijateljskih veza između grada Istanbula i općine Cazin.



Udruženje privrednika Tumisad

S obzirom da je istovremeno u gradskoj upravi boravio i ministar za Evropsku uniju u Vladi Republike Turske, Egemen Bagis, načelnik Ogrješević razgovarao je sa ministrom o stanju u općini Cazin i BiH općenito. U poslijepodnevnim satima gostima iz BiH organizirana je posjeta udruženju „Be-šir“ koje se bavi realizacijom socijalnih programa. Sa generalnim sekretarom ovog udruženja Fatihom Sariyarem razgovarano je o mogućnostima stipendiranja studenata iz Cazina koji izraze želju za studiranje u Turskoj. Istog dana upriličena je posjeta istanbulske općine Sultanbeyli, gdje su načelnika Ogrješevića ugostili domaćini, načelnik općine Huseyin Keskin i zastupnik u državnom parlamentu Republike Turske Metin Kulunk. U ugodnoj i prijateljskoj atmosferi razgovarano je o mogućim oblicima saradnje između dvije općine.



Susret sa ministrom Bagis-om

Svi ovi susreti i razgovori rezultat su prijateljskih odnosa predstavnika Općine Cazin i turskih općina sa kojima se njeguju partnerski odnosi. Vjerujemo da će budućnost donijeti ekonomske, kulturne i društvene rezultate ove saradnje.



U općini Sultanbeyli

Bošnjak u selu Yeni Koy



USVOJEN BUDŽET OPĆINE CAZIN ZA 2012. GODINU

Sjednica OV Cazin

Dana 27.03.2012. godine na višesatnoj sjednici OV-a Cazin razmatrani su najinteresantniji materijali u toku jedne godine, u prvom redu Budžet općine Cazin i Finansijski plan JU „Komunalno stambeni fond“ za 2012. godinu.

Prijedlog budžeta u ukupnom iznosu od 18.072.684,00 KM usvojen je većinom glasova prisutnih vijećnika, a usvojena je i Odluka o izvršenju budžeta.

Prema riječima načelnika Ogrševića budžet predstavlja strateški dokument jedne lokalne zajednice, koji obezbjeđuje funkcionisanje općinskog organa uprave, a ujedno predstavlja okvir za razvoj i ulaganje u infrastrukturu i privredu. *„Osim toga, budžet ima i snažnu socijalnu dimenziju, koja se ogleda u izdvajanjima za određene kategorije stanovništva, stipendije, prevoz učenika, dopunska prava boraca, izdvajanja za mnogobrojna udruženja, pomoć u liječenju, finansiranje sportskih i kulturnih događaja i sl. Ubijeden sam da ćemo ove godine, uz određene uštede bazirane na pozitivnim zakonskim propisima, uspjeti realizirati planirane projekte“*, riječi su načelnika Ogrševića nakon što su na OV usvojili ovi značajni dokumenti.

Na istoj sjednici je usvojen i Prijedlog Finansijskog plana JU KSF Cazin u iznosu od 11,5 miliona KM.

Za finansijsku realizaciju Odluke o osnivanju i uspostavljanju privredne zone „Ratkovac“ usvojene u 2011. godini Općinsko vijeće je u nastavku sjednice donijelo Odluku o prvoj emisiji obveznica Općine Cazin javnom ponudom putem sarajevske berze vrijednosnih papira u planiranom iznosu od 1.000.000,00 KM. Sredstava pribavljena putem emisije obveznica Općine Cazin poslužiće za rješavanje imovinsko-pravnih pitanja i uređenje infrastrukture poslovne zone „Ratkovac“ u Čoralčićima. Usvojena je i Odluka o kratkoročnom kreditnom zaduženju u iznosu od 500.000,00 KM, koje će se otplatiti u tekućoj fiskalnoj godini, a općinski načelnik je zadužen za realizaciju iste.



Obraćanje načelnika

Vijećnici su uzeli značajno učešće i u raspravi o Odluci o plaćama i naknadama državnih službenika i namještenika u Jedinственном općinskom organu uprave Općine Cazin, koja je i usvojena nakon rasprave i obrazloženja da se radi o usklađivanju na osnovu trenutno važeće pravne regulative na federalnom nivou, a podrazumjeva i određena smanjenja koeficijenata.

Na ovoj sjednici je također donesena Odluka o pristupanju osnivanju javnog preduzeća „Agencije za razvoj Cazin“, d.o.o. Osnivanje općinske razvojne agencije predviđeno je Strategijom integritanog razvoja Općine Cazin za period od 2011–2020. godine, prvenstveno sa ciljem stvaranja povoljnog privrednog ambijenta.

Odlukama o davanju saglasnosti za dodjelu koncesije privrednom društvu „Pro-kop“ d.o.o. Cazin i o utvrđivanju naknade za korištenje javnih dobara, odnosno eksploatacije mineralne sirovine, bez veće rasprave vijećnici su dali jednoglasnu podršku, uz obavezu da Geodetski elaborat o polaznim tačkama bude sastavni dio Ugovora o koncesiji, dok je Uvjetovanje o plaćanju naknade za eksploataciju sastavni dio Odluke.

Na samom kraju sjednice usvojena je i Odluka o izmjeni i dopuni Odluke o utvrđivanju značajnih datuma na području Općine Cazin, kojom je 7. april postao jedan od značajnih datuma, s obzirom na činjenicu da se za taj datum iz 1992. godine veže formiranje čete TO MZ Stijena, prve vojne formacije na području općine Cazin.

Održana svečana sjednica općinskog ŠTABA CIVILNE ZAŠTITE

U kabinetu Općinskog načelnika, a povodom 1. Marta - Međunarodnog dana CZ i Dana CZ Federacije Bosne i Hercegovine, u srijedu, 07. marta, održana je radno - svečana sjednica općinskog Štaba civilne zaštite. U radnom dijelu sjednice, pored usvajanja Izvoda iz zapisnika i realizacije zaključaka sa prošle sjednice Štaba, razmatran je i usvojen Izvještaj o utrošku sredstva posebne naknade za 2011. godinu, kao i Plan utroška istih u 2012. godini. Zaključeno je da su se sredstva posebne naknade koristila u skladu sa važećim propisima i da je potrebno nastaviti sa opremanjem organizovanih struktura civilne zaštite sa ličnom i zajedničkom opremom, pristupiti obučavanju i osposobljavanju istih, te povodom Dana općine planirati i organizovati jednu vježbu u koju treba uključiti veći broj subjekata zaštite i spašavanja.

U svečanom dijelu sjednice, Načelnik Štaba civilne zaštite Mujić Said podnio je referat o dostignutom stepenu razvoja civilne zaštite, u kojem je naveo sve opasnosti koje su nakon rata ugrožavale živote, zdravlje i materijalna dobra građana, posljedice djelovanja istih i rezultate kvalitetnih i pravovremenih priprema i provedenih mjera zaštite i spašavanja.

Pohvala JU Gimnazija Cazin



Nakon iznijetog referata pristupilo se uručivanju pohvala zaslužnim pojedincima i kolektivima, koje je uručio Komandant štaba mr. Nermin Ogršević i to:

1. Za uspješno dugogodišnje zbrinjavanje i pružanje pomoći stanovništvu i građanima u stanju socijalnih potreba:

- MDD Merhamet – RO Bihać

2. Za uspješno dugogodišnje učestvovanje na takmičenju iz prve pomoći i postizanje zavidnih rezultata na kantonalnom, federalnom i državnom nivou.

- JU „Gimnazija“ Cazin,
- JU Osnovna škola „Cazin II“ Cazin,

3. Za uspješno provođenje naredbi i odluka Općinskog štaba CZ, unapređenje sistema zaštite i spašavanja i pružanje pomoći lokalnom stanovništvu u ličnoj i kolektivnoj zaštiti od prirodnih i drugih nesreća.

- MZ Cazin i
- MZ Gnjilovac.

Radni dio sjednice Štaba



Zajednička fotografija



Osnovana prva cazinska razvojna agencija

Odluka o osnivanju JP Agencije za razvoj Cazin d.o.o. (ARC), usvojena je na sjednici Općinskog vijeća 27.3.2012. godine, a ideja o njenom pokretanju razvijala se duže vremena. U samoj Strategiji razvoja općine Cazin predviđeno je njeno osnivanje, zbog čega se odmah i krenulo u realizaciju.

Osnovna potreba za ovakvom agencijom na općinskom nivou nastala je formiranjem obuhvata poslovne zone Ratkovac u Čoralićima. Osnivanje, uređivanje i upravljanje poslovnim zonom jedna je od osnovnih aktivnosti kojima će se ARC baviti. To podrazumijeva i privlačenje investicija u samu poslovnu zonu na način da se kontaktiraju potencijalni domaći i strani investitori, da im se pruži podrška u procesu registracije, pronalaženju partnera i slično.

Agencija za razvoj će uz saradnju sa općinskim službama, javnim preduzećima i javnim ustanovama biti ključni nosioci implementacije i provedbe Strategije integriranog razvoja Općine Cazin. Uloga općinske razvojne agencije će se ogledati kroz pripremu i implementaciju programa i projekata definisanih općinskom strategijom razvoja u tri sektora: ekonomskom, okolinskom i društvenom.

Osim toga, Agencija će pripremati razne radionice i treninge za unapređenje poslovanja, organizirati susrete sa privrednicima iz drugih zemalja svijeta, pružati savjetodavne usluge privrednicima i zainteresiranim investitorima i distribuirati važne informacije u okviru kapaciteta koji su joj stavljeni u nadležnost. Ona će biti poveznica javnog, privatnog i civilnog sektora u izgradnji strategijskih partnerstava kroz prijavu i provedbu projekata koji doprinose podizanju životnog standarda na području Općine Cazin.

Jedna od prvih aktivnosti na kojoj će ARC raditi odmah nakon svoje registracije biće realizacija saradnje sa bratimljenim općinama iz Turske, općinom Develi iz Kayserija i istanbulskom općinom Şile, čiji predstavnici se očekuju sredinom aprila 2012. godine.

Za njenog prvog direktora imenovan je Amir Mulalić MBA, mladi, obrazovani Cazinjanin, koji već ima iskustvo rada u razvojnoj agenciji.



Cazinfo INFO BILTEN OPĆINE CAZIN

TEHNIČKI PODACI

Izdavač: Općina Cazin

Urednik: mr. Irma Alićajić

Lektor: EVRON d.o.o. Banja Luka

Dizajn: EVRON d.o.o. Banja Luka

Štampa: GRAFIS d.o.o. Cazin

www.opcinacazin.ba

e-mail: press@opcinacazin.ba

